

INUIT ATAQATIGIIT

INATSISARTUNI



Nuuk, 6. december 2013

Inatsisartut suleriaasianni § 37 naapertorlugu matumuuna Naalakkersuisunut imaattunik apeqquteqarpunga:

(Inatsisartunut ilaasortaq Sara Olsvig, Inuit Ataqatigiit)

Apeqqutit:

1. Greenland Minerals and Energy Ltd.-ip tunngaviliisua, siornatigut piginnittuusimasut massakkulluunniit piginnittuusut Australiami pinerlunniatigitiinnut atassuteqartuunersut aammalu Somaliami, uuliasiornermi aatsitassarsiornermilu pilersaarusiamut allamut tunngatillugu, pinerliiniaqatigiinnut aningaasalersuisuusarsimanersut Naalakkersuisut uppernarunnaarsissinnaavat imaluunniit uppernarsarsinnaavaat?
2. Greenland Minerals and Energy Ltd. (GMEL)-imik siornatigut qularnanngitsumik piginneqataasuusimasut massakkulluunniit piginneqataasuusut Australiami pinerlunniatigitiinnut atassuteqartuunersut Somaliamilu, aatsitassarsiornermi uuliasiornermilu pilersaarusiamut allamut tunngatillugu, pinerliiniaqatigiinnut aningaasalersuisuusarsimanersut Naalakkersuisut uppernarunnaarsissinnaanngikkunikku taava pinerluttuliornermut pinerliiniartuliornermullu tassunga attuumassuteqarnerup pissusia annertussusialu pillugit Naalakkersuisut qanimut misissuataarisitserusussinnaappat?
3. Greenland Minerals and Energy Ltd. (GMEL)-imik siornatigut qularnanngitsumik piginneqataasuusimasut massakkulluunniit piginneqataasuusut pinerlunniatigitiinnut atassuteqartut Somaliamilu pinerliiniaqatigiinnut aningaasalersuisuusut Naalakkersuisut uppernarsarsinnaassagunikkit Kuannersuarni, naliliinerit ilaat naapertorlugit nunarsuarmi uranisiorfiit annersaasa pingajorilerumaagassaanni, GMEL uranimik piiaanissamat akuersissummik tunineqassappat taava Naalakkersuisut isumaat malillugu tamanna Kalaallit Nunaannut sillimaniarnermut politikikkut ajornartorsiutaalissava?
4. Greenland Minerals and Energy Ltd. (GMEL) Kuannersuarni uranimik piiaanissamat akuersissummik tunineqassappat tamanna Kalaallit Nunaannut sillimaniarnermut politikikkut ajornartorsiutaalersussatut Naalakkersuisut isumaqarfigissagunikku taava Naalakkersuisut qanoq iliuseqassappat?

Tunngavilersuut:

Australiami tusagassiuutit assigiinngitsut Greenland Minerals and Energy Ltd. (GMEL) Nar-sap eqqaani Kuannersuarni ujaasinissamat akuersissuteqartoq ukiuni tullerriaani sammisarisimavaat. Ilaatigut GMEL-ip tunngaviliisua, siornatigut piginneqataassutit amerlanersaannik piginnittuusimasoq massakkullu qularnanngitsumik piginneqataassutit amerlanersaannik piginnittuusooq, ukiorpassuarni australiaminut pinerlunniatigitiinnut atassuteqartuusimasooq, aqqit assigiinngitsut ikinnerpaamik qulingiluat atorlugit nunarsuarmi tamarmi aktianik allassimasunik ingerlatseqatigiiffinnillu piginnittuusooq aammalu aalajangersimsumik attaveqarfissatut niuerfittullu najugaqanngitsoq amerlasuutigut allaatigineqartarpoq. Australiami tusagassiuutit aamma uppernarsarnikuuat inuinnaat akornanni eqqartuussiveqarnikkut aaqqiagiinngissutini Italiamiut-Australiamut mafiaanni inummik qitiusumik inissisimaffilimmik isumaqatigiissaarisumik arlaleriarluni atuisarsimasooq. Halvfemsikkunnigooq ikiaroorntartunik isertortukkut eqqussuisartutut pinerlunnikkullu aningaasarsianik malunna-runnaarsaasartutut unnerluutigineqartarsimagaluarpoq.

Isumaliutersuut aviisimi ullormut saqqummersartumi Informationimi novemberip 28-ani 2013 saqqummersoq (<http://www.information.dk/480186>) aammalu oqaatsit marluk atorlugit isumaliutersuut Atuagagdliutini, AG-mi, nr. 49-mi decemberip sisamaani 2013 saqqummersoq suliamut matumunnga tunngasut matumuuna unnersuussutigineqarput.